

նակս էր ի կողմանս արեւմտից, և այլ մի ընդ թղթոյն առաքելով, զի ձեռնադրեսցէ զնա եպիսկոպոս, առաքեսցէ և ինքն եպիսկոպոս մի յիւրոցն և տացէ հրաման ձեռնադրել զվանուկն Գագիկ յաթոռն Աղուանից, զի մի՛ անառաջնորդ կորիցէ աշխարհն: Իսկ Հայրապետն ձեռնադրեաց զառաքեալն. հրաման ետ և եպիսկոպոսին Կարնոյ զնալ յաշխարհն Աղուանից և ձեռնադրել Կաթուղիկոս Աղուանից: Ապա եկեալ եպիսկոպոսին Կարնոյ Սահակայ և միւս եպիսկոպոսն, ձեռնադրեն այլեւս եպիսկոպոս երկոտասան՝ ըստ հրամանի գրոց, և ապա ձեռնադրեցին զԳագիկն կաթուղիկոս, և անուանեցին Գրիգորէս ըստ անուան Կաթուղիկոսին Հայոց:

Ընդ աւուրսն ընդ այնոսիկ եղեւ յանկարծակի մէգ և մառախուղ, և լցաւ առ հասարակ լեռան և դաշտ, և եղեւ շարժահագին, և կործանեցաւ մայրաքաղաքն Գանձակ, և շնորհօքն Աստուծոյ ապրեալ եղեւ նորընծայ Կաթուղիկոսն, բայց մեռաւ ի շարժմանէն մեծ վարդապետն Գրիգոր՝ հանդերձ այլ բազմութեամբ արանց և կանանց և մանկուոց, որոց ոչ գոյ թիւ, զոր սպանին շինուածքն անկեալ ի վերայ: Եւ եկն թագաւորն Վրաց Գէմիտրէ, և աւար էառ զամենայն ինչսն, տարաւ և զգրուեսքաղաքին յիւր աշխարհն. փլաւ և լեռնն Ալհարակ, և կապեաց զձորակն, որ անցանէր ընդ մէջ նորա, և եղեւ ծով, և է մինչեւ ցայսօր ժամանակի: Եւ լետ ութ ամի երեւեցաւ աստղ մի գիսաւոր լի լուսով, որ նշանակ եղեւ սովոյ և սրոյ և գերութեան, որ կալաւ զաշխարհս:

Եւ յորժամ եղեւ այլ կատարեալ Կաթուղիկոսն Գագիկ լի իմաստիւք Աստուածայնովք, փոխեցաւ յաշխարհէ, և դարձեալ խաւար եղեւ այնոցիկ կողմանցն: Եւ ապա Բէժգէ, որ եթող ըզկարգն և էառ կին, և լետ նորա Տէր Ատեփաննոս ամս քառասուն. և զկնի նորա Խամիշ ամս քառասուն, որ շինեաց եկեղեցի հրաշալի ի գաւառն Միափոր ի վանքն՝ որ կոչի Խամշի. սա եհաս յաւուրս մեր, և ապա Տէր Ներսէս եղբայր նորին, այլ հեզ և բարի բնութեամբ, որ ձեռնադրեալ եղեւ ի ՈԶԳ Թուականին Հայոց»: